



Marthe faschée que sa sœur Marie ne luy aydoit point en ses affaires, se plaint à Iesus-Christ, qui répond en l'excusant.

Raduint comme Iesus s'en alloit, il entra en vn chasteau, & vne femme nommée Marthe le receut en sa maison : elle auoit vne sœur nommée Marie, laquelle assise aux pieds de Iesus, écoutoit sa parole. Or Marthe estoit empeschée à faire beaucoup de seruices, qui faschée de la peine, vint à Iesus, & luy dist ; Ne consideres tu point, Seigneur, que ma sœur me laisse seruir toute seule ? dy luy qu'elle m'ayde. Et Iesus répondant, luy dist, Marthe, Marthe, tu as soucy & te troubles de plusieurs choses ; mais vne chose est nécessaire : Marie a choisi la meilleure partie qui ne luy sera point ostée. Or peu apres quelqu'un de la troupe luy dist, Maistre, dy à mon frere qu'il partisse avec moy l'heritage : mais il luy dist, O homme . qui m'a constitué Iuge ou partageur sur vous ? Puis il leur dist ; Voyez, & gardez-vous d'auarice, car encores que les biens abondent à quelqu'un, si n'a-t'il pas vie par ses biens : outre ce il remontra l'ou-treguidance d'un qui se confiant en ses biens disoit, Mon ame réjoüis-toy, tu as des biens assemblez pour beaucoup d'années, repose-toy, boy & mange, fay grand' chere ; mais Dieu luy dist, O fol ! tu mourras cette nuit.